

23 JUL 2001

Mahathir-Indonesia

PERGOLAKAN DI INDONESIA MASALAH MEREKA, KATA DR MAHATHIR

KUALA LUMPUR, 23 Julai (Bernama) -- Datuk Seri Dr Mahathir Mohamad berkata apa yang sedang berlaku di Indonesia sekarang merupakan masalah mereka sendiri dan segala keputusan yang diambil adalah hak rakyatnya.

"Kita harap apa yang mereka lakukan akan bawa kebaikan bagi Indonesia," kata Perdana Menteri kepada pemberita ketika diminta mengulas mengenai perkembangan politik di Indonesia berikutan pelantikan Megawati Sukarnoputri sebagai presiden hari ini menggantikan Abdurrahman Wahid yang dipecat oleh Majlis Permesyuaratan Rakyat.

Ketika ditemui selepas melancarkan kempen Organisasi Wanita Membanteras Keganasan (Ombak) di ruang legar Stesen Sentral Kuala Lumpur di sini, Dr Mahathir juga ditanya mengenai pendirian Malaysia berikutan pelantikan Megawati itu.

"Kita ada hubungan dengan kerajaan yang diiktiraf sebagai kerajaan Indonesia. Kita tidak menentukan yang mana satu yang kita nak iktiraf," katanya

Dr Mahathir juga berkata bahawa Malaysia merasa bimbang mengenai kestabilan Indonesia akibat pergolakan yang sedang berlaku.

"Kita mahu Indonesia stabil," katanya.

Dr Mahathir juga berkata beliau berharap tidak akan berlaku kejadian yang boleh mencetuskan keganasan di negara itu berikutan laporan bahawa penyokong Abdurrahman mungkin mencetuskan kekacauan.

-- BERNAMA

RV RV MAI